

Interesantna vremena ne moraju biti teška vremena



Čak i u periodu punom političkih turbulencija, zakonodavci u BiH mogu poduzeti razumne korake kojima će poboljšati život građana, rekao je visoki predstavnik i specijalni predstavnik EU Valentin Inzko u svome obraćanju poduzetnicima danas u Sarajevu.

"U proteklim danima podsjetio sam političko rukovodstvo BiH da je tokom ovog turbulentnog perioda desetine hiljada ljudi ostalo bez posla," rekao je visoki predstavnik i specijalni predstavnik EU na ručku koji je organizirala Američka privredna komora.

On je dodao da je "bez obzira na prepirke i evidentnu neefikasnost vlada, parlamenata i birokratije, stvarni napredak ipak ostvaren u nastojanjima da se ekonomija u BiH učini efikasnijom kako bi bolje zadovoljila potrebe građana."

Visoki predstavnik i specijalni predstavnik EU naglasio je da, bez obzira na činjenicu da BiH trpi posljedice globalne recesije, "investiranje u Bosnu i Hercegovinu i stvaranje radnih mesta ovdje je nemjerljivo jednostavnije nego što je bilo prije deceniju i iako se čini da se bosanskohercegovački političari vrte u krug, možemo raditi na tome da usmjeravamo novac u otvaranje radnih mesta u gradovima i selima širom BiH."

Visoki predstavnik i specijalni predstavnik EU ponovo je pozvao na brzo donošenje Zakona o obligacijama BiH i

modernizaciju sistema bankarske supervizije, inicijative koje će, kako kaže, "poboljšati poslovno okruženje u BiH i to ne na neki neodređen, postupan način, već veoma osjetno i brzo. One će pomoći da se napune džepovi miliona građana i pomoći će im da donesu hranu na milione trpeza."

On je naglasio da je "čak i u političkoj situaciji koja najmanje obećava još uvijek moguće poduzeti razumne korake kojima će se poboljšati život građana– a ne mislim da premijer Špirić, ili premijer Mujezinović, ili premijer Dodik, žele da ih se vidi kao osobe koje su prepreka takvim razumnim koracima. Na kraju krajeva, svaki od njih želi da ga se vidi kao lidera koji je unaprijedio standard građana, a ne unazadio."

Navodeći da uslijed globalne recesije "firme više ne mogu da se izvlače iz teškoća *pozajmicama*, već moraju *smisliti* kako će se izvući," visoki predstavnik i specijalni predstavnik EU rekao je da se preduzeća u BiH moraju predstaviti "u kontekstu njihovih *regionalnih* prodajnih kapaciteta, *regionalnih* mreža i *regionalnog* znanja," s obzirom da je "investiranje u Bosnu i Hercegovinu mudar način investiranja u jugoistočnu Evropu."

Visoki predstavnik i specijalni predstavnik EU zaključio je svoje obraćanje pozivom Ministarstvu vanjskih poslova, Ministarstvu vanjske trgovine i ekonomskih odnosa, Agenciji za promociju stranih ulaganja i opština da efikasnije koordiniraju svoje aktivnosti kako bi svaka ambasada BiH imala najnovije informacije o svakoj prilici za ulaganje u svakoj opštini.

On je naglasio da je to "ključni put za povezivanje sredina u cijeloj zemlji sa međunarodnim investicijama koje će donijeti nova radna mjesta na terenu."

Tekst obraćanja visokog predstavnika/specijalnog predstavnika EU dostupan je u cijelosti na internet stranicama www.ohr.int i www.eusrbih.eu